

每週經課朗誦經文(巴克禮漢羅/教羅)2014/01/01

共同經課 - 1

民數記六章二十二節~二十七節

22 耶和華吩咐摩西講：23 你 tiòh 吩咐亞倫 kap 伊 ê kiáⁿ 講：Lín tiòh án-ni kā 以色列人祝福，對 in 講：24 願耶和華賜福你，保護你；25 願耶和華 hō伊 ê 面 ê 光照你，施恩 hō你；26 願耶和華歡喜 ê 面看你，賞賜你平安。27 Án-ni in beh 用我 ê 名 hē tī 以色列人 ê 頂面；我也 beh 賜福 in。

共同經課 - 2

詩篇八篇

1 大衛 ê 詩，交 hō樂官，用 Ka-ték ê 樂器；1) 耶和華阮 ê 主 ah，你 ê 名 tī 全地到 chiah 高大！你將你 ê 榮光排設 tī 天裡。2 你因為你 ê 對敵 ê 緣故，tùi 嬰 á kap 食奶 ê 嘴，建立能力；Beh hō對敵 kap 報冤 ê 靜靜。3 我看你 ê 天，你 ê 手所造 ê，Kap 你所排列 ê 月 kap 星；4 世間人是甚麼，你 siàu 念伊？人 ê kiáⁿ 是甚麼，你眷顧伊？5 你 hō伊比天使 釐 á khah 輸，Koh 賞賜伊榮光尊貴做冕旒。6 你設立伊管理你 ê 手所造 ê，Hē 萬物 tī 伊 ê 腳下；7 就是一切 ê 羊 kap 牛，山野 ê 走獸；8 天中 ê 鳥，海內 ê 魚，Kap 見若經過海裡 ê 路 ê，lóng hē tī 伊 ê 腳下。9 耶和華，阮 ê 主 ah，你 ê 名 tī 全地到 hiah 高大！

共同經課 - 3

加拉太書四章四節~七節、腓立比書二章五節~十一節

4 但是到 hit-ê 時已經滿，上帝差伊 ê kiáⁿ，tùi 婦人人來出世，5 出世 tī 律法下，來贖回律法下 ê 人，hō咱受設立做 kiáⁿ。6 為 tiòh lín 是做 kiáⁿ，上帝差伊 ê kiáⁿ ê 神入咱 ê 心，喉叫講，阿爸，父 ah。7 親像 án-ni，你 m̄是猶原做奴僕，就是做 kiáⁿ；既然做 kiáⁿ，就 tùi 上帝來做後嗣。

5 Lín tiòh 有基督耶穌 ê 心做心；6 伊本有上帝 ê 形狀，無掠 kap 上帝平等做所 tiòh 執守 ê，7 反 tng piàⁿ 空家己，取奴僕 ê 形狀，成做人 ê 樣相；8 已經有親像人 ê 款式，就屈家己，順服到 tī 死，甚至死 tī 十字架。9 所以上帝高升伊極高，賞賜伊 hit-ê 名，poáⁿ 過 tī 萬名 ê 頂面 ê；10 hō見若 tī 天，tī 地，kap tī 地下 ê，tī 耶穌 ê 名，無一個腳頭 u m̄跪拜，11 無一個嘴 m̄稱呼耶穌基督做主，來歸榮光父上帝。

共同經課 - 4

路加福音二章十五節~二十一節

15 Chiah-ê 天使離開 in 上天 ê 時，顧羊 ê saⁿ-kap 講，Taⁿ 咱來去伯利恆，看所成 ê 事，就是主所報咱知 ê。16 就緊緊去，chhē-tiòh 馬利亞 kap 約瑟，koh 看見嬰 á 暍 tī 槽裡。17 看了，就將天使所對 in 講 chit-ê 嬰 á ê 事報人知。18 聽見 ê 人 lóng 奇怪顧羊 ê 所對 in 講 ê 事。19 獨獨馬利亞將 chiah-ê 話記 tiâu-tiâu，心內常常 teh 想。20 顧羊 ê tò 去，為 tiòh 所聽見 ê，所看見 ê，就是天使所對 in 講 ê，來歸榮光 o-ló 上帝。21 到第八日，kā 嬰 á 行割禮 ê 期，就號伊 ê 名叫耶穌，就是伊 bē 投胎 ê 時天使所號 ê。